



UVF FUNERAL SERVICE GUIDELINES

Txuj Kiv Cai Yeeb Tshoob:

Txuj kiv cai yeeb tshoob ntawm peb puj ua tseg yawm ua cia tau ntau tam lug lawm peb yuav tsw tso tseg, taab sws peb yuav txhwm khu kuas yoojyim, phim tsua lub tebchaws ntawd hab zoo tsua lub caijnyoog taag swm nuav.

1. Faab dlaab (ntsuj plig). Faab nuav tes yuav khu hab txav tsw tau vim peb Hmoob yeej ib txwm koj le ntawd lug lawm.
2. Faab qhua (taab tsua tej kwv tij neej tsa). Faab nuav yuav txhwm khu le caag los tau. Yog npaaj hab paab kuas tsev xyomcuab dlim paa hab txhob tsaug txuj kiv txom nyim tsua faab nyiaj txag hab nkim lub sij hawm ntau ntau.

Lub Sij Hawm Qheb:

Yuav txhwm khu kuas xyomcuab txuag tau nyiaj hab lub sij hawm:

1. **Qheb Friday txug Sunday**
 - a. Friday 8:00am – 10:00pm
 - b. Saturday 8:00am – 12:00 midnight
 - c. Sunday 8:00am – caij moog saam saab
 - d. Yog tsev xyomcuab muaj has lug hab slideshow, cia muab tsua nub Sunday.
2. **Qheb Saturday txug Monday**
 - a. Saturday 8:00am – 10:00pm
 - b. Sunday 8:00am – 12:00 midnight
 - c. Monday 8:00am – caij moog saam saab
 - d. Yog tsev xyomcuab muaj has lug hab slideshow, cia muab tsua nub Sunday.
3. **Nyob ntawm tsev xyomcuab pum zoo, Koom Hum tsuas txhawb nqaa xwb.**

Kiv Noj Haus:

1. Kiv noj haus tsuas npaaj kuas tau 2 pluag tseemceeb xwb, xws le su hab mo.
Kiv yuav ua noj ua haus xuum qos lawg taag nub taag mo yuav tso tseg lawm, (yog tej nkauj muam yawm yij, puj nyaaj txwv kwj los yog kwv tij neej tsa npaaj tuaj paab los tsw txwv taab sws cov nam ua mov hab tswj kaab yuav tsw npaaj lawm.)
2. Dlej haus tes npaaj kuas tau tsua kwv tij neej tsa tau haus: (Pepsi, juice, hab lwm yaam tes yuav txu kuas tsawg le tsawg tau. Yog xyomcuab yuav npaaj los tsw cheem taab sws tsw npaaj los yuav tsw quabyuam.)



3. Cawv (Beer) tsuas npaaj miv ntswv tsua txwv kaam xwm hab txwv qeej txwv ntsuag swv ua kiv cai xwb.
4. Txwv maab txwv ntoo hab khoom txom ncauj yog tsev xyomcuab yuav npaaj los tsw cheem.
5. Tsw nqaa khoom noj hab dlej haus moog ncig cheem tsua suavdlawg, tsuas tshaaj tawm qha tas yog leej twg yuav noj yuav haus los cia nyiag moog muab nyiag xwb.
6. Yuav txwv tsw ua fawm, qhaub poob hab qhaub piau nyob tsua lub tsev txag (funeral home).

Kiv Tua Tsaj – Nyuj/Twm:

1. Tub lab nyob ntawm nam-txwv xwb, yog npaaj tsw tau los tsw tua, yog npaaj tau los tua 1 tug xwb.
2. Muaj qos puj tub ki, taab sws tej tub ki tseem yau, yog npaaj tsw tau tes muab nyiaj thov xwb, yog npaaj tau tes le tua 1 tug/tsaj qaab hlua.
3. Txawm muaj 10 leej tub los tsuas tua 2 tug tsaj xwb. Taab sws yuav hu cov xov txwv dlaab tuaj ua qhua saib. Thaum kws moog hu puab tuaj ua qhua ntawd yuav tau has plov meej tsua puab tas tuaj ua qhua saib xwb, yuav tsw muaj kaus tsua puab qaij hab yuav tsw nqug puab moog nas tsum. Yog has tas cov ntxhais vauv, tub xeeb ntxwv, hab ntxhais xeeb ntxwv yuav tua tsaj los tsw txwv taab sws tsuas tua tuaj ua zaub noj xwb. Tsw yog le ntawd tes muab nyiaj tuaj paab kiag xyomcuab xwb.
4. Nyob ntawm tsev xyob cuab xwb. (Xaav ua luj npaaj luj, xaav ua yau npaaj yau.)

Tub Coj Xai/Kiv Has Xwm:

1. Txuj kiv yuav txav txwm sab muaj tub coj xai tsw muaj tes nyob ntawm tsev xyomcuab.
 - Yog tug taag swm neej ntawd muaj tub muaj ki kuas tseem yau los yog tsev tuab neeg ntawd txav txwm sab xaav kuas muaj tub coj xai lug foom kom tsua tej tub ki tes npaaj kuas muaj xwb.
 - Yog tug taag swm neej ntawd yog ib tug laug los yog tsev xyomcuab txav txwm sab tsw muaj tub coj xai los yeej tau, tsw ua caag. Maam le thov ob tug kaav xwm lug foom tau le caag yuav le ntawd xwb. Thaum zoo le nuav lawm ncij xub qeeg yuav civ, lub tsooj yuav nqug lug txheeb, taab sws tsw muaj tub coj xai tes tug npua qhau xwm yuav tsw muaj. Thaum txheeb taag tes cov nyob sau tsooj sawv lawm tes tug kaav xwm los yog tug kaav xwm thov cov kwv tij kws txawj foom kom lug has tau peg tsawg zaaj tsua cov tub ki los yuav tsawg zaaj xwb. Tsw le ntawd los ua ntsab lug has tau tsawg lu los yuav tsawg lu. Dlhau le ntawd tes tuam tsooj hab tsa tsooj lawm xwb tes cia le.

Cov Tub Dlha Dlej Num Hab Txuj Num:

1. Txwv Qhuab Ki.
 - Yog qha kiv tsua tug qauv moog cuag puj cuag yawm.



2. Txwv Cuab Tsaav.

- Yog tug tuaj tuav dlav laig dlaab tsua tug qauv.
- Yog tug paab ntseg tsev xyomcuab teg dlej num, npaaj txhua yaam tsua lub cawv xeeb cawv laav hab ntseg txuj kiv plaub ntug huv tuab sw.
 1. *Yaav neej qub thau u tes tug txwv cuab tsaav yog tug txwv tsev xyom cuab los sws tej tub ki kuas ua lub nteeg kuas luj hab zoo haj tsw txaaj muaj tsua tej kwv tij neej tsaa. Yog tej tub ki tsw muaj nyiaj yuav tsaj tua los yuav txwv kuas coj tub ki moog muag kuas tau nyiaj lug yuav tsaj txhu lug tua tsua nam txwv.*
 2. Lub neej nuav tsua tom ntej tes tej nuav yuav tau muab hloov lug le nuav. Txwv cuab tsaav txuj num yog tuaj paab tsev xyomcuab lub cuab yig kuas dlhau txuj kiv txom nyim hab muaj txuj kiv kaaj sab xwb. Tug txwv cuab tsaav yuav nug seb tsev xyomcuab yuav npaaj lub cawv xeeb cawv laav hov luj le caag. Yog tsev xyomcuab npaaj tau le caag tes tsuas ua le ntawd xwb. Yog tsev xyomcuab npaaj tsw muaj los txwv cuab tsaav yuav tau ntsug chawj hab thov tej kwv tij neej tsaa kws muaj feem xyuam ua kuas dlhau moog xwb.
 - a. Yog thaum ntawd ntshav tau tug txwv cuab tsaav txum phaaj lug lig hab nwg paub txug txuj kiv cai zoo tes nwg lig hlo moog.
 - b. Yog thaum moog thov tug txwv cuab tsav, txum phaaj kws tsw paub txuj kiv cai zoo tes cia tsev xyomcuab maam le txav txwm sab tas muaj Thawj Xyomcuab lug ntseg kiv plaub kiv ntug, kiv xaiv kiv lug los tsw muaj.
 - c. Txawm tas tug txwv cuab tsaav yog ib tug **tsw paub los yog paub** txug txuj kiv cai hab nwg teg dlej num zoo los, tsev xyomcuab yeej muaj cai ntshav **Thawj Xyomcuab** lug ua tug sawv civ ntawm tsev xyomcuab lub xub ndlag.

3. Txwv Kaav Xwm.

- Ob tug txwv kaav xwm yog paab tug txwv cuab tsaav ntseg xwm (dlaws teeb meem) hab saib kaam noj kiv haus huv lub cawv xeeb ntawd.

4. Txwv Qeej.

- Txwv qeej txwv ntsuag txuj num tes yog tshuab qeej ntaus ntsuag lawv le txuj kiv cai dlaab qhuas tsaws le txwv cuab tsaav hab xyomcuab nyiam. Txuj cai tes yog tshuab qeej *koob moov*, tu sav, nci neeg, cob tsag, qeej tshais, su, mo, hlawv ntawv hab lwm yaam tsaws le txuj cai.

5. Tshwj Kaab hab Nam Ua Mov.

- Yog cov tuaj ua num tsua 2 tug kaav xwm lug npaaj noj npaaj haus tsua tsoom kwv tij neej tsaa hab tej phooj tej ywg kws tuaj koom lub nteeg ntawd.



- Yog lub cawv xeeb cawv laav ntawd luj, yuav tau npaaj kuas muaj 3 tug tshwj kaab 3 tug nam ua mov.

6. Txwv Txag/Tub Sau Ntawv.

- *Yaav ntuj thau u tes txwv txag yog tug ntaus thawj moog ntuv ntoo lug txua fwm hleb tsua tug tau taag swm neej ntawm.*
- *Yog tug tua fwm hleb. Thaum txua tau hab muab dlhos tau taag lawm es yuav muab lauj es kwv lug tsua peg ntxaa tes muab tua. Tua yog muab taus los sws tsag txav 1 saab 2 tsag kuas dlhaas kiag 1 dlaim ntoo tawm. Tua 2 saab hab saab sau. Yuav tau muab tua ua ntej maam muab tug qauv tso tsua huv lub hleb.*
- *Thaum coj tug qauv moog zais, txwv txag yuav tsum tau chib cov tuab neeg kws tau coj tug qauv moos zais ntawd tej ntsuj plig hab ua kaaj ntug.*
- *Taam swm nuav tes tsw muaj ntoo ntuv lug txua txag lawm taab sws tseem swv lub npe nuav lug nyob tsua sau lub tsum kuam muaj tsaws le tej laug tej zaaj tej haiv kws puab ib txwm muaj hab cov laug yeej tsw kaam kuam muab 2 tug txwv txag tso tseg. Yog le ntawd, muab 2 tug txwv txag lug ua 2 tug tub sau ntawd hab tub tuav nyiaj txag lug paab tsua 2 tug txwv kaav xwm.*

7. Tub Yuav Khoom/Tu Tsev.

- *Yog moog yuav khoom noj haus hab paab tu tsev.*
- *Yaav ntuj thaum ub, peb cov laug yeej ib txwm swv 2 tug tub aub dlej hab 2 tug tub txav tawg lug ua zaub ua mov noj. Lub caij nuav tsw swv lawm vim peb tsw muaj dlej aub hab tawg txav lawm taab sws xaav kuam tsov qaab muaj 2 tug tub lug yuav khoom hab tu tsev.*

Hu Tuaj Qaij Kaus:

1. Yog Txhwb Vaag qaug (tug txwv tsev): Nyob ntawm tsev xyom cuab txav txwm.
 - a. Hu tug puj nyaaj.
Has tsaws le Nkiag Tswb Pov Nplaib Vaaj cov lug, “Yog txug tug txwv tsev taag swm neej tes hu muam. Yaav ntuj thau u yeej yog le ntawd.” Txuas ntxwv nuav moog suav dlawg yuav maaj maam hloov kuas tau le nuav. Yog tug nug taag swm neej yuav tsum hu muam tuaj qaij kaus vim nkauj muam ntsaug nug yog ob tug noj swb hlub haus swb ci tsaaj.
 - b. Hu tug nam txwv dlaab.
2. Yog Txhwb Loog qaug (tug nam tsev)
 - a. Hu tug nam txwv dlaab.
Yog txug tug nam tsev taag swm neej tes hu tug dlaab laug tuaj qaij kaus vim nkauj muam ntsaug nug yog ob tug noj swb hlub haus swb ci tshaaj.



Txhaab Ntxwv:

1. Thaum muaj tug noj tsw qaab nyob tsw zoo, kiv yuav qheb tsua qhua tuaj nyob ntawm tsev xyomcuab yog qheb 2 nub ua ntej thaum yuav tshu tug qauv lug ua dlaab ua qhua.
2. Yuav tau teem cai muaj 1 nub tsua cov tub dlha dlejnum tuaj uaki yuav tau nqug lub tsooj txws, cob hab qha teg dlejnum tsua puab, yog muaj dlaab tsw los yuav tau has kuas meej pem tsua lub caij nyog ntawd thab tsev xyomcuab yuav lug pe suavdlawg.
3. Tsaj tua ua ntej tsw tau tshu tug qauv lug ua dlaab ua qhua yuav tsw txhem nqaj tsua txwv qeej txwv ntsuag lawm, taabsws yog yuav kuas txwv qeej txwv ntsuag tshuab qeej cob tsag nua tes le maam txhem.
4. Thaum coj tug qauv huv lub tsev txag (funeral home) moog nci tseb, yuav npaaj muaj 6 leej naav khaub dluag zoo lug fwj xwm tug qauv, dlua le cov tsuas sawv ua 2 kaab ua ntej ntawm lub tshab kws yuav xaa tug qauv moog nwg vaaj nwg tsev xwb.
5. Thaum sawv kiv moog saam saab yuav tsw pub xyomcuab moog ua ntej tug qauv hab thaum moog txug tsua tug qauv lub vaaj lub tsev lawm yuav tsw pub xyomcuab tawm ua ntej tug qauv tuaj txug.

Cim Xwm:

- ❖ Nuav yog 1 dlam living document xwb, yog leej twg muaj lug nug hab xaav ntsug Koom Hum txhwm khu kuas zoo le caag los caw koj has tuaj qha los sws sau ntawv tuaj tsua Koom Hum tau paub. Koom Hum yuav zoo sab hlo tog txais koj lub zoo tswvyim tuaj txhwm khu kuas zoo hab yooj yim le yooj yim tau...

